

四庫全書

集部

欽定四庫全書

集部

白雲樵唱集卷三

詳校官庶吉士<sub>臣</sub>李傳熊

中書<sub>臣</sub>劉源溥覆勘

總校官知縣<sub>臣</sub>繆琪

校對官編修<sub>臣</sub>王嘉曾

謄錄監生<sub>臣</sub>汪存靖

欽定四庫全書

白雲樵唱集卷三

明 王恭 撰

五言近體

金陵送入落第歸江南

鳳臺寒日莫千里送君還別夢愁京雨鄉心結楚山落  
花偏擁棹歸鴈獨臨關應醉家林月青雲好是閒

野望

極浦遙山外  
荒江瘴海頭  
夕嵐松葉暗  
孤嶼鳥聲幽  
塞笛飄寒淚  
隣謳起莫愁  
連天秋草色  
歸思日悠悠

送鄭浮丘被詔重赴京師

關河殘葉下  
征棹復西遊  
遠火臺城迥  
微霜禁苑秋  
詔書天上出  
宣室夜深留  
浩蕩論經史  
時時近冕旒

送劉逸人還山

天高寒日莫  
念念獨還山  
綠樹懸心遠  
孤雲入望閒  
水流侵石榻  
落葉擁柴關  
別後分遙想  
諸峰杳靄間

梅江夜泊

卸帆依暝渚帶酒宿沙頭  
戍鼓嚴更漏寒鐘落釣舟  
霜明城下水月暗海西樓  
薄曉啼猿罷蒼蒼遠樹愁

山人入城

行行別翠微迢遞入城扉  
故舊多零落人煙半是非  
清霜寒使馬落日動軍麾  
薄莫遙鐘起還尋舊路歸

題無諸廟壁

野廟大江干蕭蕭樹色寒  
斷碑荒草沒畫壁古苔乾  
龍

去春潮在猿鳴海月殘英雄那可問東逝更漫漫

客中聞子規

關路草淒淒楓林杜宇啼思深湘岸曲聲斷郢雲西故  
國春歸盡他鄉客去迷淒涼聽漸近疲馬亦長嘶

春莫田家

野藤垂谷口林徑少人行茅屋先春補沙田候水耕籬  
深孤犬吠樹密一鳩鳴花落家僮掃寥寥遠市聲

江樓聞笛

纖月絳楓林晴樓覆夕陰誰家吹鳳管永夜作龍吟楊  
柳邊頭恨梅花客裏新天明漢江上唯見水雲深

古鏡

匣裏菱花鏡摩挲恨轉深土花浮綠暈秋月閉寒陰漢  
女曾窺貌秦人已照心蛟龍今剝落徒爾折黃金

夏夜曲

初日照迴廊鳴璫出洞房竹清殘暑氣荷沉小池香雪  
脫宮羅潤雲鬟夜月涼庭前有梧葉早晚落銀牀

翡翠

羨爾炎州翠雙栖羽翼微雨香紅玉背風颺碧羅衣避  
鵲藏深竹啣魚上釣磯吳宮矜首飾莫道網羅稀

送人從海城軍

從軍江海上征棹去微茫瘴雨孤城白秋風大野黃旌  
旂連蟹舍烟火近鮫房但使封侯貴何須憶故鄉

送人還嶺海

別君滄海上況是暮秋天亂葉驚離席孤雲逐去船荔



枝瘴雨外柳葉夕陽邊回首風塵隔相思共渺然

松寺清秋

迢遞青蓮宇雲邊事事幽松花山路晚鶴夢寺門秋黃  
葉僧前落清泉屋上流所嗟塵累久那得此淹留

秋日遊山寺

荒山殘日晚秋思正淒涼野鳥啼花徑溪泉溜竹房鐘  
聲雲外遠樹色雨中黃更與詢休輩焚香坐石牀

送衲子遊方

乞食向人烟心閒處處禪浮杯江上月浣衲澗中泉蜀道峨眉遠廬山瀑布懸孤雲自飛去誰得扣玄玄

聞劉一敦擢監察御史

幾年遊璧水一旦候金扉勅賜騎驄馬人看著錦衣天連楓陛曉霜借栢臺威此際如相憶毋令尺素稀

輓邢逸民

流落衣冠沒他鄉幾度春青山行賣卜白首坐忘貧昔愛林中酒今為草下塵平生數行淚為爾獨沾巾

老將

髮白未侯封休論舊日功  
酌恩空有劔錫宴豈無弓  
關塞孤愁外風霜百戰中  
太平應棄擲流落灞橋東

挽僧

人間那久住隻履獨西歸  
夜雨虛禪座寒山葬衲衣  
鵲栖青草塔猿吊白雲扉  
從此無期會空令淚欲揮

夜到漁家

渡口集昏鴉綠村徑路賒  
楓青迷野水竹密暗江沙  
遠

火人聲絕孤帆日影斜扣門驚犬吠如入子陵家

宮人入道

雨露恩寧薄烟霞思獨迷向人披鶴氅無分卷龍衣女  
伴愁將別君王夢亦稀他年青鳥使啣表到金扉

經漂母墓

寂寞淮陰路荒城接楚原誰能懷漂母曾此飯王孫孤  
塚今猶在千金不復論身慚非國士茲去向何門

昭君怨

掩淚向邊州君恩此日休身隨塞上遠心是漢宮愁雁  
塞春難度龍堆草易秋玉容何足貴翻作羽林羞

山路見落花

野花垂嶺口無主亦芳菲色映林僧帽香隨木客衣淒  
涼猿折去零落鳥啣歸日暮人行絕山風吹更飛

送林山人入城

林棲無外事訪舊入東城漸失聞猿處多逢結駟行古  
榕藏驛舍殘柳拂軍營薄暮遙鐘起紛紛辟荔情

題王孫挾彈圖

金衣騎小鐵迢遞茂陵山按鵲花邊落鳴鞭柳外還斷  
猿驚羽箭過鴈落金丸歸醉瓊樓夕天街雪正寒

寒村訪隱者

谷口微霜度寒村獨見君西風正蕭索落葉不堪聞古  
路無行客閒門有白雲為憐幽處好不忍便離羣

秋暮寄山中人

水國催寒早微霜幾夜砧懷君隱居處殘葉亂山深野

鳥無遺跡孤雲不繫心懸知燈火夕閒坐聽猿吟

書江山別意圖送羽人還神樂觀

羽人何處去歸事玉宸君飛珮花間別橫簫鶴上聞過  
關闔樹斷絳席楚江分想到齋宮夕園丘候五雲

同故人曾伯剛燕集陳家樓

偶作山陽會翻驚夢裏逢盍簪憐草色攜手嘆萍踪雨  
暗樓中樹雲閒鳥外峯故人湖海氣應不愧元龍

書谷口雲深圖

連峯轉幽邃竟夕白雲多峽裏非人境春深但女蘿仙  
源空翠遠香界斷鐘和鸞鶴飄飄去塵蹤獨奈何

題黃聲玉環清樓

樓虛千瘴合水木澹清華積雨仙源白歸雲鳥道斜  
衣凌野翠捲幔拂秋霞想見橫經夕蒼藤落數花

梅江送林中州歸龍塘

清時尚不官道在任家寒夜夢梅花帳朝吟苜蓿盤魚  
風吹鬢冷蚌月照衣殘歸去鄉林下橫塘竹萬竿



題郁判官望雲思親卷

吳岳片雲橫偏關遠官情鄉林孤望斷客路寸心傾帶  
鴈迷親舍綠霜度客旌太行曾按節千古重懷英

題陳孟敷耕圖

野情魚鳥邊孤興寄秋田霜降黃花酒山空白日眠雲  
根絀帙散林杪桔槔懸予亦棲棲者遙知沮溺賢

擬唐儲光義題陸山人樓

愛爾幽棲處樓居水木清松高鶻夢竹密助猿吟簾

捲山光入窗虛日色明獨慚官府繁臨眺不勝情

擬唐祖咏江南旅情

支離那可道搖落倍淒然歸夢將秋月愁心對暮天吳  
山蒼靄斷楚樹白雲連日夕涼風動鄉原若个邊

擬唐祖咏題韓少府水亭

少府愛清暉孤亭近翠微石林娛晚坐池水淨風扉野  
鹿啣花過溪雲帶鳥歸何須謝纓冕臨眺始忘機

擬唐祖咏蘇氏別業

忘機依別墅豐水帶南山野竹連孤嶼溪雲伴獨閒鹿  
鳴花外去鶴夢雨中還寂寂何人到年年但掩關

擬唐王仲初邊上送故人

羌笛與鐃歌相逢奈別何關河孤夢斷邊地幾人過沙  
磧鴻聲小輪臺雪片多看君馬上去拚取醉顏酡

寒夜擁爐有懷

擁爐寒夜坐寂寞對閒居凍雪千山白情人萬里餘京  
南無過鴈汶上少來書愁絕殘燈裏橫窗片月虛

送人奉使市馬

使節向宛西承恩出御堤千金求駿骨萬里得霜蹄漢  
武思神驥燕昭重馭隄歸朝應早計首蓿苑中齊

送僧遊金陵

金陵維帝里宮闕五雲間師到是何日禪西若箇山浣  
衣天界曉梵紫金閒早晚門人念東林定裏還

上已遊五雲寺

詩酒蘭亭會如何共遠公行看五雲裏絕似虎溪中清

梵花臺雨名香竹  
遲風未須論袂袂  
自覺萬緣空

暮春送人還溫陵

斗酒惜分襟  
溫陵驛路深  
關河孤客棹  
滄海故人心  
老葉迷行旆  
桐花醉客簪  
清源仙洞好  
知爾日登臨

征婦怨

夫壻遠從征  
雲中路幾深  
作旗餘帳帛  
買劍斷釵金  
被綉香蘭淺  
粧奩鳳影沉  
年年衣上淚  
隨恨寄寒砧

挽黃蘗大休上人

隻履復還西令人憶我師空門了生滅塵世漫淒其馴  
鵲棲新塔靈花落故枝愁來雙樹下空有淚如絲

送人之雲雨

雲中路不窮迢遞入烏蒙馬上看山別天涯見月同昆  
明波淡淡金齒樹朦朧異域空相憶音書幾日通

送人從溫陵軍

溫陵南海上孤劍獨橫行策馬經花縣看山到柳營明  
珠來市舶荖葉遍山城長揖嫖姚幙從容論五兵

贈倭僧

叅方離日本乞食向中州  
滄海無行跡浮天但法舟  
扶桑孤島曙貝葉舊房秋  
偕問西來意無言坐石頭

送人使重驛

奉詔浮東海魚龍護去舟  
雙星別鵲鵲幾日過琉球  
絕島夷王拜重番使節遊  
歸朝應早計休起見京樓

梅花戍觀練兵

笳吹動江城將軍練五兵  
水搖金甲影風度角弓聲  
戎

幕斜連海軍麾遠下營時平嚴武備非欲樹功名

夏日遊碁山寺

載酒空門下林幽暑氣清半天聞梵語雙壁隱鐘聲野  
鳥知禪意孤雲薄世榮何應謝塵事從此學無生

夏夜泛江因造澹山

畫舫宜涼夜滄江酒氣清星河分棹影鷗鷺起歌聲海  
曠天低水潮平月到城澹山有佳處遙見蚌珠明

送中州逸人歸龍塘



幽棲何處是積水近柴扉樽酒沙頭別輜軒月下歸竹  
深林鳥待村遠故人稀遙想齋居裏狂吟竟落暉

挽林醫敬仲歿爪蛙圖

君懷秦緩術埋骨向扶桑昔賣人間藥今修地下方魂  
飛隨漢使客葬感夷王此日龍門道清猿益斷腸

寄衣曲

秋風飛虜塵閨裏搗衣頻拭淚逢邊使緘情寄遠人不  
辭勞妾手未省稱君身莫待封侯日歸來但著新

梅江送林澤中歸嶼南

賣藥偏成隱相逢但布衣  
梅江秋外別花嶼雨中歸  
遠火千峯夕遙鐘獨鴈飛  
自言今白首此去故人稀

客中見新燕

可憐江中燕幾日到烏衣  
欲向誰家去多應舊主非  
落花深巷小喬木畫梁稀  
自笑天涯別秋風想未歸

題漁舍秋烟

茆宇鄰鮫室青山落釣舟  
菊潭霜漸冷楓樹葉皆流  
酒

醒聞邊鴈機閒見海鷗烟波隨處好妻子亦無憂

山居春曉

仙源隔幾塵林館更宜春葉暗青連雨雲孤白近人浣  
衣溪沫綠濯足莖苔新余亦無機者誅茅願卜隣

寒夜宿張藻宅偶賦

旅人眠不安抱劍夜中彈月映花林白霜淒畫壁寒澹  
雲孤夢遠流水半生殘想是平原館萋萋草正繁

都門即事

都門閒望處車馬滿香塵禁繞龍池樹鐘殘鳳闕春衣  
冠三輔客劒履五侯賓唯有揚雄宅門前草自新

五言排律

奉賦閩藩叅政鳳陽張公忠孝堂

淮右多卿族天朝重縉紳東膠呈彩鳳左轄應祥麟荒  
服資文化名藩寄大臣一官忠孝在三調渥恩均戀闕  
瞻天迫榮親愛日頻懷英雲獨望令伯表深陳鄉遠龍飛  
處堂高鶴髮新塗山青歷歷濠水綠津津衣彩趨庭夢

腰金報主身甘棠何彩華風木忽悲辛霜露思泉壤雲  
霄睇玉宸心隨葵藿盡情感蓂莢真堂構仍先志綱常  
激後人所希登宰輔特此贊皇仁

寄三衢陳八董教

懷君屬秋暮離思滿涼天百越孤雲外三衢獨鴈邊  
鳴飛楚葉潮落見湖田泮水橫經綠柯山卷幔連醉吟  
官舍雨興掃墨池烟舊業閑三迳移家戀一簾風霜憐  
宦薄雨露喜生全交態今寥落相思獨惘然逢秋驚髮

變悵別使心懸欲拜桐溪墓因行雪夜船

書宋儒陳烈官誥後

吾愛陳夫子名高慶厯中官卑心獨古跡道道彌通屢  
薦金門剡難羈壁水銅七閩沾化雨百代仰儒風芸閣  
絲綸在芹宮祀享同雲孤憐故物應復繼高蹤

歐陽明府絃歌亭

令尹大忠後廬陵世代深青年宜帶印白日但鳴琴浩  
蕩春陽澤雍容太古音一亭崇禮教百里動謳吟露冕

朝氛淨褰帷午樹陰風雲飄逸氣山水寫冲襟桃李清  
官舍棠梨胃客簪昔聞常衮化今識子游心高士恒分  
榻貧人屢賜金所希金石刻千古作佳箴

美憲僉陳公重修玉融天寶陂

咨訪代宸聰霜威八郡中褰帷詢潦旱按俗憫年凶地  
古潯防失江流斥鹵通綉衣親計粟玉節坐鳩工瘴海  
秋騰隼關河曉駐驄已兼修廢墜非但慰疲癯陂水寒  
仍綠陂田歲又豐永貽饘粥惠寧忘我侯功利澤思王

景思波感白公銘心那可報鐫石紀無窮

書黃典幕磐石書室記

盤石隣幽構青山獨下惟別來鄉望斷心遠宦情微官  
舍羈黃綬親闡念綵衣祇應懸魏闕那得戀春暉故國  
銅魚杳音書白鴈稀家林唯有夢時遶薜蘿歸

題新寧陳叔永環秀樓

勝地三峯峙名家幾葉繁太丘聯遠裔瀉水接長源飛  
構岡巒入連甍紫翠樊樓開孤島上人語白雲根爽氣



朝來台清暉夕更繁  
旁窺冠德秀前眺太常尊  
蕭寺香林舊隋朝古木存  
煙空遙見鴈秋杪近聞猿  
葭莢平臨海鳧驚宛在  
疊擢歌迴竹浦漁笛帶楓村  
幔卷霞生席簷虛瀑照門  
盡攜山水興全隔市朝喧  
魚沫吹簾影藤花映履痕  
機忘泉滿聽琴靜月當軒  
蕭洒衣冠里棲遲竹素園  
境起揚子宅人擬謝公墩  
靜賞疑盤谷幽尋訝陸渾  
高譚皆玉屑列坐總瑤琨  
自笑東山隱叨逢北海樽  
丹梯期再會重與了心言

林景時雲山圖

鷺嶺積蒙茸連山翠幾重險疑金粟洞高訝玉華峰谿  
迥雲藏屋林深雨翳鐘客帆秋外小仙珮鳥邊逢夢遶  
三花樹歌殘五粒松考槃多在澗惆悵獨迷蹤

題姑蘇吳大剛中和堂

吳君有道者隱處入松陵堂構中和在人將太古稱箕  
裘今奕葉簪綬世飛騰榻有留徐穉門多候季膺興來  
書滿案歡極酒如澠山水長招隱琴樽或聚朋桃溪春

漲小笠澤晚波澄芳草簾頻捲孤雲几獨凭松江全帶  
雨茗水半流水琳館聞霜磬香臺見夜燈茆亭深絳月  
雪洞盡垂藤賢聖惟心到乾坤一氣凝仲尼嗟已遠茲  
道更誰徵

書滄州翁家藏高漫士山水圖

草屋帶滄波連峰掃黛蛾路疑盤谷入門訝輞川過野  
杖依松桂春衣換薜蘿弄琴魚鳥近卷幔水雲多機靜  
都忘世槃成遂永歌紛紛人代裏纓冕欲如何

七言近體

吳城懷古

姑蘇城下刺蘭橈，却憶吳王古市朝。  
香輦路邊春寂寂，館娃宮外草蕭蕭。  
千年往事空啼鳥，半夜疎鐘自落潮。  
明發不堪回首處，暝烟秋雨過楓橋。

送客之揚州

廣陵西上路悠悠，此日憐君賦遠遊。  
吳岳曉鐘迷遠騎，楚天涼雨到孤舟。  
瓊花觀裏春何在，煬帝宮前葉漸秋。

二十四橋歌酒夜玉簫吹斷使人愁

經鄂王墳

疋馬南行度浙河汴城宮殿遠嵯峨中興諸將思恢復  
負國奸臣主議和黃葉古祠寒雨積青山孤塚夕陽多  
六和塔影西風裏陵樹蕭蕭野鳥歌

賦得白鴈送人之金陵

燕山榆葉望秋稀雪羽瀟瀟向楚微夜雨蘆花看不定  
夕陽楓樹見初飛影隨漢騎營邊落夢遶羌人笛裏歸

金少隱先生集卷三  
君到石城霜漸冷暮雲聲斷欲沾衣

送僧試經赴金陵

奉詔西遊說梵經秋風應到石頭城帆飛楚水舟中飯  
夢落淮山樹裏行一錫獨攜空界月三車遙對廣庭聲  
禪心彼此隨緣住塵世空驚遠別情

贈別友人之長沙牧

青年作郡被恩榮五馬蕭蕭向楚城關外葉飛鄉舍遠  
湖南草綠吏人迎嶺雲漠漠空離恨津樹依依若送行

君到長沙應暇日定懷賈誼不勝情

送人遊廬山

廬峯天外麗清暉金削芙蓉合翠微石鏡倒明華頂曙  
香爐遙絳瀑泉飛謫仙吟處苔應沒惠遠門空客到稀  
此度山人多邂逅為君談笑拂塵衣

江城春盡偶作

郭外空林帶夕霏海天離思遠依依流年又逐殘春去  
華髮空驚兩鬢稀啼鳥落花孤夢斷白雲芳草舊遊非

金史四庫全書  
卷三  
家園此日堪惆悵  
況是天涯客未歸

逢廢塚有感

敗壙崩塋不記時  
況逢寒食最淒其  
天陰燐火沉荒樹  
雨積苔花入斷碑  
塵世謾傷千古事  
人生誰是百年期  
白楊風裏堪惆悵  
日暮聞猿但益悲

甲戌歲九日旅懷

客裏淒涼欲暮愁  
忽逢佳節倍離憂  
西風白髮慚烏帽  
旅舍新寒憶敝裘  
千里故人同落葉  
十年歸夢隔滄洲



別來記得家林賞黃菊花時醉不休

寄野寺殘僧

古寺蕭條絕四隣寺前松栢幾回春月明下界猶聞磬  
年老荒山少見人貝葉舊聽雙樹法衲衣孤坐兩朝身  
秋風已爛蒲團草悟得西來意自真

送人貶海南

官亭幾度飲離觴此日憐君謫遠方馬上看山椰葉暗  
津頭沽酒荔枝香秋深嶺表猶多瘴臘盡天南尚少霜

憔悴更須懷直道臨歧何必淚沾裳

送越山隱士

憐君久住在空山寂寂岩扉晝不關  
落木寒泉青嶂裏素琴孤鶴白雲間  
五陵年少何曾到三逕秋來祇獨閒  
欲問塵中何事業青雲能有幾人還

題彭韞玉秋山行旅圖

閒門秋晚葉皆飛征路逢霜客漸稀  
獨樹斷損愁遠騎隔林殘燒映行衣  
西風一飯人烟少落日千峰夕鳥微

莫向他鄉留滯久故園山水候君歸

溫陵留別陳方山先輩

溫陵雪後鴈聲寒芳草青青客未還千里離情江上月  
十年鄉思夢中山荒城對酒應難別遠路逢春好是閒  
滄海故人零落盡臨歧那忍聽陽關

題郭韓臣家藏趙大年汀渚秋烟卷

大梁公子寓滄洲幾百年中墨尚留芳草祗疑韋曲社  
青山多是洛陽秋天邊積靄鴻初斷浦口微霜葉盡流

遙想繁華何事業汴河東去更悠悠

題長樂林生叔達湖山幽處

樓前積水映丹楓清隱林扉趣不窮人影迥臨飛鳥上  
書聲遙在翠微中青山對酒聞猿斷花嶼橫琴與鶴同  
此日長安鳳城內五陵車馬正匆匆

題墨梅

林下花時雪更繁蕭條茗筵共誰看空香半入高僧定  
霜影全侵鶴夢閒任著隣歌江上發恐隨邊笛月中殘

故人天外遙相憶欲寄南枝愧獨難

喜林崇高見過

十年萍梗愧西東千里佳期此日同  
圖畫祇今追北苑衣冠誰復識南宮  
鄉心幾度春雲外詩思千峰暮雨中  
欲把酒杯留醉賞沙頭歸珮莫匆匆

和林孔逸見寄之作

淮陰漂泊嘆王孫生事蕭條一劍存  
春草閒堂思舊業暮雲孤館寄荒村  
月明野寺同栖鶴落葉寒山聽斷猿

傾蓋相逢誰似者且陪歌舞倒芳樽

次韻陳九狂客西岩見寄之作

黃金沙界繞岩堯鐘磬微微下九霄  
禪榻烏啼殘雨過香臺經盡落花飄  
心持半偈應淺身寄迷途恨獨遙  
堪笑此生何住著期君天路遠相邀

賦磐石秋風送別

磐石蒼蒼入翠微秋風嫋嫋碧羅飛  
淒涼半度誰家笛  
颯沓全吹野客衣孤嶂斷猿聲漸遠  
荒崗殘樹葉將稀

由來此處堪乘興何事同心又遠違

次韻答高漫士 二首

萍梗飄飄未遇時此懷唯有故人知  
離心幾度曾相夢交態於今更不疑  
黃菊青樽誰共榻白雲高館獨垂帷  
遙知玩字樓中月應怪登臨每負期

林館深秋黃菊殘微霜楓樹葉初丹  
浮生祇解劉伶醉失路應憐范叔寒  
落日斷鴻愁裏聽故園衰草夢中看  
龍門知己能相問欲和陽春愧獨難

寒夜宴別陳叔晦

得霜字

縣城高館宴離觴，共對寒燈別意長。  
孤嶂啼猿驚落葉，誰家殘笛度微霜。  
雲山驛路遙相送，魚鳥滄洲舊莫忘。  
知爾懷人何處是，秣陵春樹遠蒼蒼。

送林彥賓之淮上省兄

斗酒何須惜路岐，此行偏感鵲鷦詩。  
青山野店淮南暮，孤棹微鐘雪後時。  
猿斷曉關驚落葉，鴻飛滄海憶連枝。  
十年官冷英山下，幾度看雲悵別離。



王融謝生見過

客裏留君喜盍簪天涯攜手便同心  
青山舊業何須嘆野館殘尊且共吟  
滄海斷鴻將落葉夕嵐疎雨帶寒砧  
他鄉況是交游少萍水相逢思轉深

哭陳叔晦

祇道青雲定有期忽聞長逝使人悲  
尊前握手難重會客裏論心更與誰  
月隱屋梁愁獨夜魂飛淮海夢歸時  
青山何處荒墳樹未結吳鉤淚已垂

留別馮公魯兄弟

海國微霜葉已丹，玉壺清酒夜漫漫。  
天寒客路鴻聲曉，月落芳江樹影殘。  
情在不堪分手去，興來猶戀故人歡。  
惠連羣從偏能賦，一曲驪歌欲和難。

送蔣節庵鍊師還建上

十年江海慕清芬，何事逢君又別君。  
花嶼到來應幾日，茆山歸去獨尋雲。  
清溪碧水琴邊落，黃葉秋聲鶴上聞。  
自愧萍踪無住著，欲將飛佩息塵紛。

送林思禮歲貢成均

十年漂泊故人稀，歲晏逢君又遠違。  
候館莫鴻驚別夢，粵河殘雪照行衣。  
潮生楚岸風帆夕，樹遶淮山驛路微。  
此度橋門應早達，莫忘書札問林扉。

病中喜鄭浮丘見過

煮藥烟中靜掩門，泮林官暇動行軒。  
天涯蹤跡慚多病，客裏心期憶共論。  
空館亂蟲孤燭夜，荒原殘葉數家村。  
相逢未久還分別，愁倚秋風獨斷魂。

早秋懷林良箴因憶東峯諸上人

正月孤帆別遠津  
秋風林下忽沾巾  
他鄉久住愁雙鬢  
故國遙看隔幾塵  
江海又逢初下葉  
關河同是未歸人  
坐來更憶東山賞  
共對閒僧話夙因

為陳穀駿賦東墅閒居

習靜何須隱翠微  
一閒心遠便忘機  
窗臨絕嶼雲來近  
門掩荒洲客到稀  
禾黍露寒秋釀熟  
蒹葭霜冷夜漁歸  
知君悟得幽棲趣  
却向清時祗布衣

初秋寄清江林崇高先輩

十年滄海寄萍踪，迢遞鄉山思萬重。  
鳥外明河秋一葉，天涯涼月夜千峯。  
心知久別魂應斷，生事中年夢亦慵。  
無限相思何處著，越山仙島樹蒙茸。

寄三衢董教授陳孟敷

離別中年夢亦驚，未應王謝獨闌情。  
家林久已無音信，江海今餘幾弟兄。  
浙水斷鴻秋半影，粵河殘葉夜中聲。  
遙憐姑蔑千峯裏，何處相思月自明。

奉餞鄭浮丘赴召天京二首

三楚文衡憶重持，泮林寧厭一官卑。  
論經已被先皇詔，懷策今逢聖主知。  
長樂曙鐘宮漏永，蓬萊宵烜珮聲遲。  
承平正爾需賢佐，莫對鄉山悵別離。

黃葉山中把酒杯，行人西上鳳凰臺。  
關河馬色迎寒度，江郭鴻聲帶曉催。  
三禮才名天下少，九重丹詔日邊來。  
慙知此別雲泥隔，擬欲彈冠愧不才。

與連川吳彥器夜酌

延陵才子舊知名今日應憐好弟兄  
客裏襟期疑是夢天涯萍水況多情  
清秋一葉琴中落黃菊孤尊月下傾  
傾蓋相逢還又別不堪江上斷鴻聲

送陳平叔歸黃山

沙頭宴別酒微醺客裏那堪獨送君  
蓬鬢相看渾似夢萍踪無定又離羣  
黃山草聖誰同調處士香名世共聞  
莫嘆蔡邕今已老仲容年少總能文

題王融鄭可久遊建溪卷

谷口閒耕歲不豐烟波何處寄行踪孤舟夜泊鐔津度  
九曲朝看玉女峯殘葉市橋溪上酒夕陽蕭寺鳥邊鐘  
遠遊知有懷親夢應到鄉山第幾重

逢楊珣感舊

十年萍梗愧相違我尚飄零子未歸江國鴻聲驚別棹  
河橋草色照行衣他鄉共嘆生涯薄往事空憐故舊知  
日暮臨歧倍惆悵伯勞東去燕西飛

近體留別楊二高隱客三山



別情羈思共何如  
迢遞鄉山夢有餘  
仙井碧泉思舊業  
客庭芳草對離居  
關河夜笛鴻飛外  
海國春帆雪霽初  
愧我萍蹤無住著  
知君終食故江魚

寄蔣節庵鍊師

觀門迢遞碧蘿陰  
塵跡空懷物外尋  
滄海月明人去遠  
瑤池秋晚鴈來深  
孤雲野鶴悠悠別  
積水江楓夜夜心  
遙想山中多勝事  
相思時復寄瑤琴

贈別王董教弟歸沔陽



白酒黃花醉共驩  
景陵歸思又漫漫  
愁看南浦連枝別  
況是西風落葉殘  
三楚帆飛湘鴈遠  
五華人去海霜寒  
故鄉却戀多魚米  
應念賢兄尚冷官

送林彥時謝得圭之建上

才子溪行秋興深  
仙舟同汎復同心  
也知王粲偏能賦  
誰識稽康更解琴  
驛館夜殘明候火  
市樓霜曉度寒砧  
遙憐別後陽春調  
客裏何人為賞音

書建寧守宣城芮公敬亭山房

宛陵南面敬亭峰山水青青思萬重  
雪霽雙溪寒對酒風來遠岫夜鳴松  
窗臨太白看雲處門對玄暉玩世蹤  
聞道一麾今出守未應林下獨從容

題宋王駙馬西園雅集卷

西園簪珮日聯翩共愛風流戚  
晚賢金將池臺連帝里玉堂詞翰  
藹賓筵機閒羽士絃中意心靜林  
僧竹下禪莫向繁華驚物換大梁  
宮樹也蕭然

閩江別意送陳伯武服闋之天官

無諸故國柳條新折柳空江悵遠人殘雨綠蕪分別路  
斷雲歸鴈送行塵孤舟蕩漾家林夢雙闕依稀帝里春  
遙想仲容終宦達定應風木更悲辛

暮春寄曾伯剛

紅燭深窗獨夢君十年多難愧離羣愁看青浦無來鴈  
吟對滄波見夕曛楓樹幾回秋外落竹枝誰忍夜中聞  
相思況是殘春雨目盡遙天漠漠雲

同高漫士夜集陳叔謨山莊

傾蓋相逢意轉親  
六平高館醉殘春  
流年白髮看花盡  
幾夜青燈對雨頻  
心逐斷鴻猶惜別  
興隨芳草更留人  
龍門知己情何限  
飛佩應憐寂寞濱

莫春邑中與漫士別時滄洲叟命邀不果來

縣城春暮雨紛紛  
歌罷驪駒厭獨聞  
蓬鬢相逢俱未達  
萍蹤無定又離羣  
綠蕪客路風將遠  
黃鳥官亭酒半曛  
江上草堂誰倚和  
杜陵白髮更思君

贈別林伯予召天京兼柬鄭助教董紀善

蓬萊薦剡五雲深才子囊書赴上林  
雙澗野僧留別偈  
七岩山色寄離心  
廣大官舍期同飲  
記室王門待盍簪  
明到秣陵應話舊  
為言江畔獨行吟

青雲知己半京華  
滄海逢君又別家  
暮雨獨瞻原上栢  
春風遙泛日邊槎  
吳門渺渺江波晚  
淮樹蒼蒼驛路賒  
聞說九重憐孝念  
未應辜負舊煙霞

寄曾伯剛趙景哲

鴻鴈南飛不寄聲  
暮雲春樹遠含情  
白湖高館何年別

青浦孤帆幾日行  
香界竹深僧共隱  
市樓花滿酒同傾  
誰憐白髮滄江上  
閒倚東風聽晚鶯

為樵僧賦閒雲軒

城郭紛紛靜者稀  
野雲多戀定僧衣  
依微乍入靈花去  
瀟散仍隨法雨飛  
心寄虛空忘色相  
身將生滅悟禪機  
世人未識孤寒意  
遙聽經聲禮翠微

秋夜陪鄭助教蒼林宴集分得深字

沙堰雲歸半夕陰  
露荷烟篠淨煩襟  
明河一葉秋聲早

金匱山房集 卷三  
紅燭虛庭醉影深  
壁水舊遊千里會  
青山歸興故園心  
滄洲況與蒼林近  
此地應期重盍簪

挽陳方山先輩

清朝遺老舊參軍  
幾處移家遠世紛  
白馬公孫何事業  
青袍書記向來聞  
西風野水山陽笛  
秋草黃花郭外墳  
零落異鄉空有淚  
憑誰書記出江雲

歲暮岱峯同龍門漫士留別高景度先輩

龍門歲晚惜同心  
迢遞龜峯遠更尋  
殘雪亂山頻對酒



白雲芳草又分簪  
離堂夜燭猿聲斷  
別路江楓鴈影深  
名下只今多俊逸  
臨歧高唱比南金

送別林彥時之建上

黃葉紛紛秋滿天  
故人今夜惜離筵  
他鄉見月長為客  
別路風霜半在船  
劍浦綠蕪連晚燒  
幔亭荒樹帶寒烟  
明朝碧水丹山下  
知爾相思若箇邊

送嚴主簿罷官歸黃州

罷官歸種故侯瓜  
鄉國蒼茫楚望賒  
湘水無情空弔古

江離初綠暫還家  
鸞栖野棘誰同調  
玉點青蠅未是瑕  
宣室他年思賈誼  
更持黃紙到長沙

閩江別意贈丘孟政服闋之天官

錦袍紗帽去飄飄  
風木聲中思轉遙  
春樹暮雲愁對酒  
綠波芳草暫停撓  
白門月曙聞孤笛  
楊子江寒見落潮  
此度官遊須補報  
未應空荷聖明朝

山水圖為造士陳叔能書

屋上羣峯舊隱居  
澹雲涼月午窗虛  
滿庭芳草人稀到

半畝黃精手自耒積水斷橋寒鳥外夕陽鳴磬夜霜初  
泮林莫羨蘇門嘯未許尋山共結廬

辛巳九月邑大夫率僚佐及羣士燕六平峯

薜蘿迢遞隱仙都簪佩登臨載玉壺闕樹早霜秋外落  
奧河寒笛鴈邊孤紅泉翠壁人皆醉綠酒黃花晚更須  
此會明年誰最健重尋山水採茱萸

奉和國子先生鄭孟宣退朝聽鶯之作

蓬萊佳氣滿瑤京禁柳青青聽曙鶯輦路下聞千囀曉

春風遙度萬家聲近隨天仗和鸞馭散入雲門間玉笙  
不獨清平歌此調高臺還有鳳凰鳴

書閩郡照磨江右曾公秩滿之京使道省親卷

欲賦萊衣未有期且將簪弁戀明時三年考滿孤琴在  
千里寧親一鶴隨建水暮帆鐘杳杳楚城寒鴈樹離離  
過家暫醉西江酒莫遣都門疋馬遲

送陳樂舞省墓歸閩復還天京

宮縣聲繞鳳臺春萬舞雍容對玉宸華表忽驚千歲別

恩波遙借一歸人邊淮獨樹斜連海故隴寒楸遠入閩  
莫向塵中成久別太平天子重明禋

題姑蘇王仲珣松陵展墓圖

花縣寧親著綵花松陵回首念荆扉鄉心正逐吳雲斷  
離思偏逢朔鴈稀丘隴蓬蒿隨處沒邊頭風雪幾人歸  
明朝足馬姑蘇道遙望松楸入翠微

題玉融鄭伯勲龍江環翠樓

舊遊西上久從官何事樓居尚考槃近郭雨深千樹繞

滄波雲盡數峰寒  
簾前落葉簾秋聽  
笛裏飛鴻拂曙看  
好是瑞岩僧磬晚  
滿衣清露更凭欄

玉融潘原潤將義葬其師黃山陳平叔一日持廣  
賻集過予愧貧不能助遂賦此以贈之

布衣相對兩忘貧  
共憶黃山淚滿巾  
高士姓名因有傳  
中郎書籍與何人  
墨池雨冷苔空積  
筆塚秋深草自新  
惆悵一盃何所寄  
唯應高誼獨悲辛

簡曾伯剛

逢君傾蓋轉銷魂多少離心不忍論  
白首異鄉無舊業  
青山衰草閉閑門  
關河夜雨頻驚夢  
鵲鴉秋風久負言  
莫向樽前同感慨  
舊游能有幾人存

嶼南宿別貢士林執中

得青字

紅燭離堂酒半醒  
驪歌今夕若為聽  
故人好是身隨桂  
浮客空嗟跡類萍  
花嶼晚鐘湖上別  
鳳臺春樹夢中青  
應知畫綉長林下  
白首還來到玉瓶

癸未元日簡龍門高漫士

喜得春回共酒期  
醉來持鏡轉堪悲  
年慚伯玉知非晚  
身笑相如見遇遲  
衰鬢又逢殘臘後  
勞生幾度改元時  
遙憐小隱龍門下  
應對椒盤獨咏詩

贈林士仁服闋赴京師

秋衾銅輦夢來稀  
墨綬新縣映赭衣  
風木不堪寒夜聽  
塞鴻偏向別時歸  
晴天入楚千峰出  
積水邊淮獨樹微  
想到鳳臺朝覲後  
宦遊何處念春暉

題蕭將軍家藏山水圖



十年身被白雲留見盡青山到白頭微雨數峯孤磬夕  
半林殘火幾家秋風波不繫袁宏棹魚鳥相懷謝尚遊  
聞道將軍戎暇日偏能看畫想滄洲

越山秋色送秦校尉還觀海軍

稽峯閒望赤城標霞氣蒼茫水霧消獨樹過江吳地盡  
斷雲歸海楚山遙空林木葉驚秋雨極浦鴻聲帶晚潮  
相約買舟尋賀老知君終事霍嫖姚

送林叔仁計階之京

泮林官滿欲趨朝  
況值金門早見招  
粵國青山江上別  
秦淮秋水鴈邊遙  
砧催帝苑霜初落  
馬度官城葉漸飄  
若得浮丘書信便  
為言衰老尚漁樵

贈林漢孟赴召天京

七峯岩下舊逃名  
何事輜軒赴上京  
白首相逢萍梗別  
青山誰共薜蘿情  
疎煙野火丹陽騎  
遠樹春風白下鶯  
想到都門知已在  
南宮西掖有逢迎

題吳景元江臯雲卧

宦遊西上正紛紛何事江臯獨卧雲夢裏杜蘭隨意綠  
鏡中魚鳥向人分潮歸沙館當窗見漁唱楓州卷幔聞  
身外浮名都不繫唯應林叟得逢君

和林孔逸見寄之作

西岩爽氣亂峯頭此地曾陪靜者遊雨霽珠林芳草遍  
春深蘭若落花幽清池白石俱禪意野服黃冠半道流  
自愧浮生無住著飄然江上一孤舟

贈別劉宗禮還京師

官船一櫂大江流才子還京賦遠遊帆帶夕蕪依御苑  
夢隨涼月到家樓長淮鴈影催寒曙近郭砧聲報晚秋  
此度金門應早達莫令鄉舍久淹留

送浮丘鄭先輩被命重赴京師

丹陽京口暝烟收幾度勞歌送客遊吳岳曉連秋雨碧  
御河寒帶鴈聲流衣冠召對金門裏文翰周旋玉案頭  
聞道漢庭深顧問承平不遣賈生憂

贈別林孔逸從薊丘軍

越城砧杵暮紛紛多少閒情此送君  
別路寒山驚落葉深秋孤鴈忍離羣  
蘇門日照霜中樹羌笛寒淒塞上雲  
聞道漢南曾獨立也將書劍去從軍

寄鳳池故人鍾大

谷口遙鐘半掩門疎燈空館住荒村  
機杼葉上驚新雨砧杵聲中憶故園  
多難未銷豪傑氣長貧難答舊交恩  
鳳池月色歌鐘裏應念殘山獨聽猿

書延平王將軍閩山勝覽卷

遠攜兵印鎮南州山水青青馬上遊  
玉帳醉看華頂溜  
瑠弓閒掛劍潭秋  
雙溪樹底泉聲合  
九曲花邊瘴雨收  
自是承平多勝事  
七閩應許擅風流

道人延翠軒

山水嬋娟掃黛屏  
清暉迢遞到柴荆  
雲歸獨樹天邊小  
雪罷孤峯鳥外青  
寒蘚帶花侵卷幔  
野泉流葉近閒庭  
浮生只解人間事  
未得從師種茯苓

寄滄洲狂客

三年憔悴得君憐  
君上青雲益惘然  
客裏思鄉何日到  
天涯見月幾回圓  
末期歲晚同攜手  
預恐新正對別筵  
貧賤獨慚無可贈  
臨歧空憶繞朝鞭

奉荅陳滄州

白髮滄洲似耆稀  
瑤華應愧寄林扉  
每憐獨客如萍梗  
更有何人惜布衣  
梧葉滿庭殘暑退  
青山對酒小涼歸  
莫愁壁水音塵遠  
早晚關河候鴈飛

寄劉大

閒宵燈裏夢劉郎夢覺還驚是兩鄉孤館幾回江上月  
流年空度鏡中霜青蒲野水林扉靜黃鳥山亭酒甕香  
遙想丘園多樂事也應飛札慰離傷

留別黃山周氏兄弟

候館逢霜落葉深更堪憔悴對青衿荒村野水殘陽路  
遠樹孤雲故國心絕地也憐頻送酒情多誰忍更分襟  
惠連羣從皆清俊別後相思總解吟

文筆山房為延平郡造士朱員賦



大筆山深隔翠微，清暉迢遞映書幃。  
門臨絕澗逢人少，簾卷孤峯見鳥飛。  
四壁泉聲喧午夢，半簷藤影落秋衣。  
鐔津自昔多才俊，詞翰如君世所稀。

挽黃山周正卿

與君相識便相知，却歎相逢最後時。  
滄海幾回明月夜，黃山終負薜蘿期。  
秋風野水寒猿斷，落葉荒原弔客悲。  
遙想泉臺今不恨，傳家應有鳳毛奇。

書番陽戴氏侍萱堂卷

樂平才子舊知名曾是清朝被寵榮  
萱草別來應有夢白雲頻望不勝情  
關河迢遞娛親舍銅綬淹留近海城  
他日錦衣歸省去故園鄱水有餘清

歐陽明府江上草堂

青原山上草堂開竹杖黃冠日往迴  
雨過新潮低卷幔雲連孤嶂落啣杯  
聞碁每憶林間榻靜釣還思石上苔  
佳政祗今人共說未應陶令賦歸來

題晦之城南秋堂

汾陽孫子久忘機，萬卷經書隱翠微。  
閉戶不知秋葉落，卷帷時見白雲飛。  
岩花色映烏紗帽，澗水聲寒薜荔衣。  
想是過庭趨講暇，也應城市往來稀。

題鄭浮丘碧蕉書館

鄭老心閒却忘官，泮林唯對碧蕉閒。  
盈軒色映烏紗帽，拂几涼生首帶盤。  
半榻秋聲寒外落，一簾幽夢月中殘。  
杜陵野老時相問，應遣題詩葉上看。

玉融陳氏怡怡堂

魏帝連枝不共榮  
淮王斗粟若為情  
風霜況是同根蒂  
骨肉應憐好弟兄  
山色曉簾沙鴈白  
海天秋嶼雪鵝鳴  
合歡也似姜肱被  
長奏埙篪酒共傾

題江山烟雨圖

夢渚蒼蒼入楚烟  
岳陽南面雨如懸  
人家寂歷青楓外  
仙嶠空濛獨鴈邊  
飛閣迴臨聞笛處  
微鐘遙到釣魚船  
孤帆莫向瀟湘浦  
雲暗蒼梧水泊天

次韻答黃嗣傑

滿林烏桕飄殘鴈獨客關心漫倚樓幾處移家驚落葉  
十年歸夢在孤舟青塘野鳥當窗白積雨寒山卷幔幽  
何似董湖高隱處朝朝巾舄與同遊

題鄭克曼復睢陽軍手卷

綠髮辭鄉白髮歸遠因行役問庭闈離心又惜連枝別  
愁思仍隨獨鴈飛汴河霜落寒砧早梁苑煙空晚樹稀  
行到洛陽秋色後柳營長是憶春暉

沙堤燕集次韻答王介軒黃嗣傑

滄洲沙館共懽攜紅燭青尊月易西孤客獨憐萍尚泛  
幽期那似鶴同棲霜飄敗葉催殘臘鴈引寒聲入夜溪  
何事故人俱斷酒風流佳句若為題

題澹游雨竹圖

孤舟涼雨楚溪頭葉葉寒聲鏡裏秋湘水夜傳金奏響  
鄂雲朝拂玉英流空香暗逐王孫夢殘粉深關帝子愁  
鳴鳳不來春杳杳為誰遺牒向中洲

送糧長林思器赴召京師

王貢曾稽夏禹篇漢庭輸餉獨推賢  
遐方已獻編民數大姓應操賦粟權  
千里山河趨魏闕一帆秋水入吳天  
楓墀若聽綸音後歸興西風白鴈前

酒盡沙頭白玉瓶海雲闕樹遠行經  
孤舟落葉丹陽渡殘笛秋風白下亭  
三楚人烟天外小六朝山色鴈邊青  
憐君此去應觀國行聽韶音到廣庭

送林思隱之金陵

布衣何事欲朝天螺渚霜空見發船  
閨樹曉闌分楚澤

越城寒火接吳烟白門酒熟誰同醉華館燈孤笑獨眠  
闕下名公多舊識莫令歸興後春前

同滄洲翁答高漫士兼寄高牧隱

多病文園興未休滄洲魚鳥待君遊花邊復掃留徐榻  
磯畔空期訪戴舟渤海詩名今獨步藍田牧興世爭求  
懸知牧隱風流在共醉清暉半占秋

耿將軍具慶堂

曾逐嫖姚立戰勲漢庭方識耿將軍千鍾已遂榮親願



一劍常思報主勤  
花拂萊衣春尚早  
月明姜被夜初分  
東吳此樂應稀少  
忠孝于今幾處聞

秋日寄王介軒先輩

林下蕭條隱角巾  
黃花時節憶同人  
陶潛解印寧辭倦  
蘇晉長齋豈是貧  
華髮流年看獨變  
青山明月夢來頻  
近聞籌谷多僊賞  
忘却滄洲野水濱

寄林彥衡訓迪嘉禾

攜李山川接上腴  
魚鹽粳稻滿東吳  
橫經不道官猶冷

祿薄還堪酒屢沽  
霜落鄉林思舊橘  
秋深江郭憶寒鱸  
綈袍別後情何限  
莫惜新吟寄野夫

次韻答王介軒

曾是天池綴曉班  
綉衣行郡遠人懽  
秋風忽夢柴桑柳  
故晚還歌楚澤蘭  
匣裏吳鉤誰復羨  
尊前郢曲和皆難  
佳期憶在來清館  
共對榕霜五夜寒

懶慢唯應漉酒中  
鶉衣無計合時人  
一瓢陋巷誰能問  
四壁秋風獨忘貧  
北闕青雲隨夢遠  
西山明月憶歸頻

卜鄰幸與滄洲近又欲移家住海濱

送郁判官秩滿之天官

東膠冠蓋舊稱賢佐郡曾分刺史權  
官署到來應似水禮闈今去獨朝天  
家臨故苑長洲樹鐘度寒山半夜船  
遙想五雲霄漢上從容又賦帝京篇

書王明府家慶

幾年戎馬悵分飛此日君恩賜獨歸  
張掖寒雲行處滿魯城霜鴈別來稀  
西江買棹尋花縣南國趨庭換綠衣

官滿他年應書綉吳門鄉樹碧依依

贈邑造士陳汝登之軍中

漢家烽火在邊庭才子西行獨請纓自是寸心懷補報  
也將孤劍學從征天門久欲陳三策沙漠今看論五兵  
莫對泮林愁此別他年還著錦衣榮

典幕席上同高漫士奉和王尹元旦密州憶子詩  
張掖何人獨冠軍遠隨征騎入邊塵天涯柝酒愁中斷  
寒盡椒花客裏春魯國山河應獨望甘州風物更誰親

斑衣此日棠陰下骨肉何須嘆越秦

奉寄龍門高漫士牧隱二先輩

玩宇平臨半占峰清暉遙映翠微松雲來鷄嶼應還倦  
鳥下龍門去亦慵池草任隨吟處長江花偏待醉時逢  
十年自笑無家別誰念滄浪遠寄蹤

輓陳方山先輩

七閩冠蓋盛繁華白首溫陵獨寄家愛客尚懸高士榻  
隱居唯種故侯瓜歸魂杳杳鄉林晚旅櫬迢迢驛路賒

誰料別來成嘆逝九原長望使人嗟

寄別陳志鴻罷官歸高涼

解印行歌出將營千軍流淚共含情鄒陽書上誰稱屈  
王粲才高賦謾成天連故國銅魚遠霜落寒江白鴈鳴  
自愧神交驚此別不堪離恨更沾纓

得官何似罷官閒閩海秋風一騎還五嶺黃茆通驛路  
百城寒水接鄉關離心不醉霜中柳歸夢應尋鳥外山  
聞說舊遊多鶚薦未應空老薜蘿間

浮丘鄭公國子助教余病不能餞寄詩以別

成均典教遂忘機，聖主恩深許暫歸。  
足馬又從江上別，孤舟還向鴈邊微。  
初霜落葉驚吳苑，夜火寒砧入帝畿。  
自笑不才逢盛世，故山空老薜蘿衣。

荒居病起對空林，隣笛誰堪折柳音。  
白首襟期驚是夢，滄波離別惜同心。  
梨關月出鴻聲小，笠澤天寒騎影深。  
遙想聖朝多雨露，未應官冷解朝簪。

題松山司警余公海城春意



曾勞弓劍事邊塵復綰銅章領徽巡  
匹馬向經吳地雪  
一官遙寄越城春  
鶯花水鎮朝衙靜  
蝦菜江鄉夜邏頻  
三載銓闈應不負  
定知霄漢沐恩新

贈琉球典簿程氏賜歸番易

冠帶趨朝沐寵光  
曾將聲教化夷王  
扶桑東際非吾土  
彭蠡西流是故鄉  
白首還家江上驕  
青山獨對雪邊房  
懸知陸賈風流在  
不羨裴家綠野堂

送陳履中侍大父入京



君家大父遠朝京，念爾辭家侍此行。  
綠酒紅亭西上路，白雲鄉樹故關情。  
孤帆夜落秦淮水，雙闕時聞禁邸鶯。  
莫道重聞今別去，鄉人遙待錦衣榮。

挽江山陳仲晉

墨綬新懸鬢已皤，宦遊西上易蹉跎。  
青山竟掩孤墳在，浮世仍傳並秀多。  
門柳不堪愁裏賦，琴臺誰忍醒時過。  
愧無公子魚腸劍，掛向空林野樹柯。

送閩藩從事考滿

西游悵飲氣偏豪多少同聲惜戶曹別路斷鴻將去棹  
亂山殘雪送征袍蓬萊春近鶯聲早阿閣雲開鳳影高  
明到五門朝覲後相思空有夢魂勞

贈陳逸民

萬事忘機一布裘似君宜向古人求秋風幾度驚雙鬢  
夜夢無應到五侯多暇興來猶散帙老年身倦少登樓  
蔡家尚有文姬在對酒當歌且莫愁

連川趙原滄洲圖

冠蓋紛紛多宦遊，憐君生事寄滄洲。  
半池草夢飛殘雨，一片荷衣掛遠秋。  
卷幔雲山天外小，近人魚鳥鏡中幽。  
遙知霜露松門夕，秋氣寒泉興未休。

偕陳叔弢宿崇山蘭若期少尹陳思孝不至賦得  
近體一首遂書於壁

化戒烟磬晚微微，何事同心也負期。  
雙樹焚香棲鳥定，空山對酒白雲隨。  
風飄仙梵清機遠，月隱禪枝夜坐遲。  
明發寄聲賢少尹，支公渾似鄭當時。

送兵衛從事考滿赴銓

幾年從事總兵機千里輜軒入帝畿  
驃騎別時多載酒故人分處尚留衣  
秦淮遠火春鴻斷長樂微鐘晚雪稀  
聞道宦遊西上好莫將蓴菜憶東歸

贈張明府入奏

滿縣棠梨春著花郎官書奏覲京華  
帆開楚水猶逢鴈道過金壇得到家  
紫禁曙鐘雲外聽白門春酒日邊賒  
遙知馬首春歸早不待青門盡種瓜

送人代兵後還鄉

十年弓馬似君稀到老還鄉願不違  
祖道百壺孤棹別溫陵千里遠人歸  
江橋夜火霜蟾熟野館秋風海菜肥  
好是北堂調膳後閒看兒女笑牽衣

和詹時雨哭永寧許將軍

劍鋒銷盡馬啼穿夷虜憑陵尚寇邊  
誰念將軍能死國遠持兵印獨歸  
泉荒城聽雨傷秋早滄海招魂愴暮  
烟忠憤向來同感激溫陵南望淚潛然

奉寄齊府紀善鄭孟宣召還京

三年書信遠寥寥知在臨淄道路遙空使多情長憶別  
誰知白首得還朝曳裾幾醉齊門酒奉使應勞漢使軺  
想到九重頻顧問好陳三策輔唐堯

寄陳仲全編修兼左春坊

宛陵曾采泮芹香一上鑾坡被寵光禁裏疎鐘移夜直  
花間鳴佩出春坊思家幾度江田綠念別休驚隴樹黃  
遙羨阿戎同禁苑朝朝如在竹林鄉

高待詔自京回必遜王修撰寄聲相問賦詩以答之

幾年分教向長沙此日搞文在帝家清禁日斜還視草  
白門朝退暫看花玉壺載酒多同醉青鬢流年想未華  
近得故人天上別感君傳語問烟霞

寄翰林王孟敷兼促皆山樵記

釣鱸橋上惜分簪別後聞君入禁林近道相如能獻賦  
誰言賈誼少知音永陽獨樹還家夢魏闕晴雲捧日心

金史卷八十三 卷三  
寂寞山林樵採事何時為記比南金

詩寄梁浮丞陳思孝工篆入翰林

故人西上悵離魂幾度封書寄華門別夢正懸江口雁  
相思誰那嶺頭損晨朝染翰臨飛閣日夕聞鐘出禁垣  
宸睿若教金石刻知君不久獨承恩

寄贈林志仁博士

麟經獨抱上王畿宮錦新裁博士衣六館夜涼聞漏起  
五門天曙退朝歸鳳凰臺上吹簫迥鵲樓前見雁飛



西掖環林應不遠相逢休道故人稀

寄潘源潤因悼黃山陳平叔

偶因行客問潘郎憶得黃山醉墨堂  
斗酒幾迴澆宿草松門何處閉秋霜  
尺書不到邊鴻斷三逕猶存舊業荒  
何日遠尋高待詔扁舟能過輞川莊

寄玉融鄭三秀才

空齋病起怯秋聲無那啼鴂向夕鳴  
涼雨一天孤燭夜斷鴻千里故人情  
寒花浥露江籬白獨樹含霜瘴海清

遙羨勝遊多上日瑞岩僧舍喜逢迎

三山林文質索咏鶴骨笛

誰竅青田一片霜宛疑橫吹到山陽聲兼隴水將魂斷  
曲盡梅花帶髓香華表仙歌驚落月瑤臺秋夢怨清商  
唯應吹上天壇去好伴雲璈事玉皇

為林中洲題馬圖

漢家神驥出宛西鳳臆蘭筋破月蹄冀北羣空知汗血  
長揚獵罷見霜蹄青絲引轡穿花入黃帕蒙鞍對御嘶

莫道時平淹棧豆飛騰思與六龍齊

送陳自立遊古田

孤舟何處興堪攜紅樹千山野水西別路鴻聲天外小  
荒江帆影望中迷到樓殘笛兼秋聽向壁新詩倚醉題  
我有相思寄流水寒潮唯到白沙谿

挽鰲峯十二明

傷心嘆逝恨千重雲想秋衣月想容青草泉門今獨閉  
綠樽池館幾時逢暮山訪寺餘殘雪花嶼尋春有舊蹤

何處臨風堪洒淚沙頭南望見鰲峯

謝得圭東嵐秋思圖

海上僊山連翠岑夕嵐孤樹遠沉沉遙天落葉鴻邊盡  
絕島殘鐘雨外深烟火數家餘舊業漁樵幾處動歸心  
秋來好是尊鱸美知爾看圖憶故林

高要嚴氏具慶堂

嚴助閒堂野水濱每同兄弟日娛親到家幾度瞻雲迥  
戀闕還應愛日頻山色半簾銅鼓曙潮聲入坐頂湖春

史臣定寫弗容傳笑拂端溪紫石勻

海天離思送林生復瓊州軍

十年弓騎向邊州暫喜還家又別愁  
綠酒江亭鄉樹晚斷雲南雁海天秋  
鯨波萬里孤舟遠椰葉千峯片雨收  
明到瓊臺霜漸冷知君長夜看吳鉤

初秋留別石田阜陽諸公

相逢那忍別匆匆綠酒清詩興不窮  
病起異鄉驚暮雨坐來高館見秋風  
關河一葉離聲裏江郭千峯醉影中

堪笑人生多是別盡簪能得幾回同

石田佳處阜陽亭幾度清遊到玉瓶金井夜凉初葉下  
石門雲盡數峯青林間掃榻同僧定洞裏鳴琴共鶴聽  
正好歡携仍又別不堪愁思晚冥冥

懷安蔣明府望雲思親卷

馬上閭闔若太行白雲飛處似河陽寧教帶雨將歸夢  
莫更因風度遠鄉親舍幾迴空外憶宦情偏向此中忘  
遙知吏散棠陰下拄笏行看欲斷腸

挽梅江陳以仁先輩

龍峯耆舊幾人存，獨客心悲不忍論。  
華表鶴歸塵夢遠，少微星墜海雲昏。  
留賓別館空懸榻，點易寒窗靜掩門。  
零落為君歌薤露，行人無淚也銷魂。

題憲檢校沈公望雲圖

隱侯家世吳湖陰，何事看雲悵別心。  
親舍幾年違色養，宦遊千里戴華簪。  
烏臺月暗懷鄉遠，鶴髮秋來入夢深。  
自昔忠臣緣孝子，白華歌盡有餘音。

贈判官扶滿赴天官

府僚官滿動行軒西出闕闕望白門千里獨隨征騎別  
一廉多付路人言趨朝不用逢揚意薦剡于今有巨源  
明到南宮應考績政成此外更何論

送邑造士蕭戴貢曹監兼似國子博士林志仁

西上青雲引興濃泮林才子躡仙蹤邊淮獨樹千峯雪  
極浦寒山半夜鐘壁水到時春鴈盡金門朝退故人逢  
風流博士如相問白首林泉事事慵



暮春宴集海田張氏家樓

分傷字

谷雨新晴海氣涼  
遠山樓外色蒼蒼  
烟深野樹聞歌鳥  
風急飛花落羽觴  
玉嶼金塘看月出  
錦筵紅燭醉宵長  
獨憐蹤跡猶萍梗  
客裏揮毫謾自傷

七言排律

贈邑長史高涼黃惟成

贊襄花縣獨馳名  
高論心閒政自平  
寸祿只充沽酒費  
一廉誰似到官清  
公餘束帶橫經坐  
吏散空庭著履行

芹泮下車嚴釋菜棠陰懸榻待時英宦遊此日非梅福  
宣室他年是賈生宛馬向來空冀北吳鉤終見發豐城  
高涼月隱鄉林夢淮泗秋深魏闕情知爾長才姑小試  
不慙黃憲舊家聲

夏日遊碁山寺燕集


塵中何處避炎蒸靜愛空王澹愛僧沙界樹涼晴作雨  
石渠泉響暗流水青山載酒隨閒到飛閣觀潮倚醉登  
水繞蓮花通寶藏路迴蘭若轉金繩仙人碁局埋幽草

開士禪扉閉古藤荒殿烏啼時近榻香臺損卧夜窺燈  
老來行止愁無地病後懽攜愧有朋明發別離方外去  
何時清興又同乘

挽鎬牧

龍陽孫子叅軍裔簪紱承家世已長千里河流通地脈  
一天奎壁煥星潢衣冠況復明三禮文采唯應備九章  
華館朋來秋寂歷楓江雲斷夜淒涼賈生年少人皆惜  
李賀才多世共傷新壟漸隨蒿里沒舊書猶帶泮林香

雲迷花嶼空飛夢月暗湍江更斷腸惆悵籌峰峰下路  
一回行到一沾裳



白雲樵唱集卷三